



partii naleraq

18. august 2020

UKA2020/67

Inatsisartut Suleriaasianni § 33 malillugu Inatsisartut aalajangiiffigisassaattut siunnersuut manna saqqummiuppara:

Qilalukkat nipinut illersorneqarnissaat siunertaralugu kangerlunni qaqqortat qernertallu sivilisunerusumik najortagaanni angallatit aalajangersimasut ingerlaartarnerisa killilerneqarsinnaanernut periarfissat misissoqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuineq UKA2021-mut naammassineqarsimassaaq iliuusissanillu aalajangersimasunik siunnersuutitaqassalluni.

(Inatsisartunut ilaasortaq Jens NapätôK')

Tunngavilersuut:

Tunup imartaani qilalukkat taamak ikitsigisut pisarineqarsinnaanissaannik uumassusilerinikkut siunnersuineq tunngavigalugu inassuteqarneq assut eqqarsarnartoqartillugu Partii Naleqqami eqqartorsimavarput. Tunumi qernertat pillugit ilisimasat nutaat tunngavigalugit uumassusilerinikkut siunnersuineq tunngavigalugu Tunumi qernertanik pisassiissutit 2019-imut sanilliullugu 16-inik ikilisillugit 50-inut allanngortinneqarnissaat siunnersuutigineqarpoq. Illuatungaatigut Partii Naleqqamit aamma tusartarparput sumiiffinni pineqartuni qilalugarpassuit takuneqartartut. Taamaalilluni ernummatigaarput uumassusilerisut, biologit, kisitsisarnerminni qilalukkat ingerlaartarnerinik nalilersuinerminni najukkani piniartunik peqataatitsisimanersut sumiiffiullu tamarmiusup kisitsiffigineqarnissaannik suliniarnerminni siunersuisarsimanersut. *Piniartut peqataatinneqarsimangippata tamanna nalunaarummi aalajangersakkanik saneqqutsineruvoq Kapitali 4 § 4 st. 3, atuisut ilisimasaat.*

Partii Naleqqap erseqqissarniarpaat issittup imartaani uumasorpassuaqarnera avataaniit akornusersuinerit illersortariaqaratsigu, uumasummi nipit atorlugit attaveqartarnerat nerisassarsiortarnerallu uumasunut pingaaruteqarluinnarmat. Tamanna aamma qaqqortanut qernertanullu atuuppoq, nalunngilarpullu sakkortuumik nipiliornerit qaqqortatigiinnut qernertaqatigiinnullu qanoq sunniuteqartarneri, minnerunngitsumillu nipiliornerit ingerlaartarnerinut sunniuteqarsinnaaneri, aamma ilisimatusartut ernummatigimmatigit, minnerunngitsumik qilalukkat najukkani innuttaasut neqissaqarniarnerinut pingaarutilerujussuummata.



partii naleraq

”Ilisimatusartut misissuineri allani takusinnaasimavaat issittumi qernertat sikusiummit 70 kilometer tikillugu ungasitsigigaluartut sikusiutip nipaani qimaatinneqartartut, soorlu aamma qaqortat nipiliorfinnit nigortitertut takuneqartarsimasoq.”¹

Tamanna takussutissiivoq umiarsuit angisuut, soorlu takornarniartaatit kilisaatilluunniit aqquaat, qilalukkat ingerlaartarfiinut sumiinnerinullu sunniuteqarsinnaasut.

Qaqortanik qernertanillu kisitsisarnerit sapinngisamik pitsaanerpaamik atugassaqartinneqarluni pisarnissaat Partii Naleqqap qularnaarusuppa.

Taamaattumik aamma kissaatigaarput qilalukkat nipiliornernut illersorneqarnissaat siunertaralugu kangerlunnut qernertat qaqortallu piffissami sivisuumi najortagaannut angallatit aalajangersimasut, assersuutigalugu takornariartaassuit angallatillu allat takornarianik angalassisartut pulaqqusaajunnaarnissaannut periarfissat misissorneqarnissaat. Tamatumani assersuutigalugit eqqarsaatigaakka Tunumi Kangerlussuaq Qaanaallu kangerlussua, taakkualu saniatigut aamma allanik kangerloqarsinnaalluni pulaffigeqqusaajunnaartariaqartunik.

Partii Naleraq isumaqarpoq uumasut, najugaqartut neqissaqarniarnerannut pingaarutillit illersorneqarnissaat siuarsarniarlugu pisariaqartunik iliuseqarnissaq pingaaruteqartoq.

Taamatut oqaaseqarlunga Partii Naleraq sinnerlugu aalajangiiffigisassatut siunnersuut manna Inatsisartunut oqaluuserisassanngortippara, Partii Naleqqamiillu neriuutigaarput siunissami qilalukkat nipinut illersorneqarnissaat siunertaralugu kangerlunni qaqortat qernertallu sivisunerusumik najortagaanni angallatit aalajangersimasut ingerlaartarnerisa killilerneqarsinnaaneranut periarfissat misissoqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut partiit allat aamma taperserumaaraat, siunissami qilalukkat nipiliornernut illersorneqarnissaa siunertaralugu, taamaalilluni taakku aamma siunissami najukkani innuttaasut neqissaqarniarnerannut pingaaruteqartuaannaqqullugit.

Pisortanut allaffissornikkut aningaasatigullu kingunerisassai: Misissuinerup ilinniagartuup ukiup affaata missaanik sulineranik akeqarnissaa (250.000 kr.) naatsorsuutigineqarpoq.

Namminersorlutik inuussutissarsiuteqartunut allaffissornikkut aningaasatigullu kingunerisassai: Soqanngilaq.

Innuttaasunut allaffissornikkut aningaasatigullu kingunerisassai: Soqanngilaq.

¹ <https://arctic.au.dk/news-and-events/news/show/artikel/bedre-styr-paa-stoejen-i-arktiske-farvande-kan-gavne-hvaler-og-andre-pattedyr/>